



Broj: 04-04-4-1853/22

Sarajevo, 24. 6. 2022. godine

**SAOPĆENJE ZA JAVNOST O OBJAVLJENOM IZVJEŠTAJU REVIZIJE UČINKA  
„PRAĆENJE REALIZACIJE PREPORUKA IZ IZVJEŠTAJA REVIZIJE UČINKA  
'EFIKASNOST STEČAJNOG POSTUPKA U FEDERACIJI BOSNE I HERCEGOVINE'“**

Ured za reviziju institucija u Federaciji Bosne i Hercegovine proveo je **praćenje realizacije preporuka iz izvještaja revizije učinka „Efikasnost stečajnog postupka u Federaciji Bosne i Hercegovine“**, objavljenog 2020. godine. Cilj je bio ispitati aktivnosti koje su subjekti revizije i nadležne institucije poduzimale na osnovu izvještaja revizije učinka i ocijeniti u kojoj mjeri su date preporuke realizovane.

Utvrđeno je da date preporuke još uvijek nisu u potpunosti realizovane, te da određeni propusti i dalje nisu otklonjeni. **Parlamentarna komisija odgovorna za reviziju i Parlament FBiH nisu razmatrali predmetni Izvještaj** kako bi svojim zaključcima obavezali nadležne institucije na efikasnu realizaciju preporuka.

Praćenjem je obuhvaćena realizacija šest preporuka. Ispitane su aktivnosti Federalnog ministarstva pravde i općinskih sudova u Sarajevu, Zenici, Tuzli, Mostaru, Bihaću, Goraždu, Travniku, Orašju, Širokom Brijegu i Livnu, koji su nadležni za provođenje stečajnih postupaka.

**Kada je u pitanju regulatorni okvir koji uređuje predmetnu oblast, utvrđen je značajan pomak s obzirom na to da novi Zakon o stečaju, shodno datoj preporuci, detaljnije i adekvatnije uređuje oblast stečajnog postupka.** Zakonom su propisani mehanizmi koji trebaju osigurati hitnost u rješavanju stečajnih postupaka. Između ostalog, propisani su rokovi za okončanje stečajnog postupka te je određena institucija koja treba vršiti nadzor nad poštovanjem tih rokova. **Međutim, Zakonom i dalje nije propisana obaveza pokretanja stečajnih postupaka po službenoj dužnosti kako bi se osiguralo njihovo blagovremeno pokretanje.**

Analizirajući aktivnosti općinskih sudova utvrđeno je da se **stečajni postupci i dalje ne provode u skladu s utvrđenim rokovima**, što se može vezati i za činjenicu da je novi Zakon o stečaju donesen tek u 2021. godini, te još uvijek nije moguće potvrditi efekte njegove primjene. Pored toga, utvrđeno je da ni **sudovi nisu poduzeli dovoljne aktivnosti, te je većina djelimično realizovala date preporuke. Svi općinski sudovi iz uzorka su u većem broju riješenih stečajnih predmeta prekoračili optimalne rokove**, a imaju i značajan broj neriješenih predmeta kod kojih su također prekoračeni optimalni rokovi. U 2021. godini, sudovi iz uzorka su od ukupno **898** stečajnih predmeta u radu, riješili **373**, od čega je **77** predmeta riješeno sa prekoračenjem optimalnog roka. Također, od **525** neriješenih predmeta, optimalni rok već je prekoračen kod **237** predmeta.

Samo su tri suda propisala proceduru za praćenje trajanja pojedinačnih stečajnih postupaka i odredila zaposlenike koji će vršiti praćenje. Većina sudova nije izrađivala izvještaje o realizaciji akcionih planova za rješavanje stečajnih postupaka, zbog čega nedostaju informacije o stepenu njihove realizacije.

**Uzimajući u obzir značaj stečajnih postupka za pravnu sigurnost, investicije, javne prihode i sveukupni ekonomski razvoj, Ured za reviziju cijeni da je neophodno da subjekti obuhvaćeni revizijom nastave poduzimati potrebne aktivnosti s ciljem efikasnog i efektivnog provođenja stečajnih postupaka.**

Kompletan Izvještaj revizije učinka dostupan je na internet-stranici Ureda za reviziju: [www.vrifbih.ba](http://www.vrifbih.ba).

